

Nuutsbreef , januari/februari 2020

Bèste Veldeke minse,

1. Vastelaovendj viere bie de Aesters?

Wie g'r in 't lèste nummer van Veldeke Bekèt höbtj kènne laeze, vèltj dit jaor vöör de vastelaovesactiviteit te keze. Óf de seniorenmatinee in Royal van CV de Aester in Ech op woonsdig 22 januari óf de bóntje middig van de Aester SU in Pej op zóndig 26 januari in de Pejjerhaof. Óf g'r keesj vöör allebei, det kan natuurlik ouch. Belangriek is det g'r vööraaf uch aanmeltj door 't bedraag te betale vöör uch zelf en de angere die g'r opgaeftj. Estebleef dudelik vermelje waat eur keuze is.

Opgave kan tót en mit 17 januari; vöör Ech uterlik 15!

2. Flitscursus plat sjriev.

Op vriedig 17 januari zal weer 'ne flitscursus gegeaave waere names Veldeke Krink Ech. Op eine aovendj van 19.00 tót 21.30 oer behanjeltj bestuurslid Piet Aben de belangriekste spellingsregels vöör 't sjriev van 't (Echter) dialek. Deze aovendj weurtj gehaoje in de Fanfarezaal, Lisweg 8 in Pej (achter de Pejjerhaof; de ingank is vanaaf de parkeerplaats naeve de Lidl). Mitdoon kosj 5 euro p.p. 'n tas kóffie inbegrepe. M'n deentj zich vööraaf aan te melje. Det kan mit de QR-code oppe website www.veldekekrinkech.nl of per email aan tslijpen@gmail.com of aa.jetten@gmail.com mit vermelding van naam, adres en tillefoonnummer. Betale kan op de aovendj zelf.

3. "Good Plat" oppe Daag van de Modertaal.

Vriedig 21 februari is weer de internationale "Daag van de Modertaal". Dit jaor organiseertj VKE den 'n spraek-oer óm good plat te sriev, vöör waem mit duitj in ein of angere optoch. Ómdet 't belangriek is det de tekste good te laeze zeen, kènne wageboewers en einzelgengers den bie ós terech mit hun vraoge wie ze get mótte sjriev in good plat. Van 19 tót 21 oer zeen w'r den in 't kefee van 't Kulturhoes aan de Plats.

Leje van Veldeke en anger belangstèllendje zeen ouch welkom es se gewuuen lekker de vastelaovendj willie inzètte. D'r is meziek, get te drènke en get te doon.

4. Declamatiewedstried.

De jeug van de basissjoale in Ech-Zöstere is weer opgerope óm mit te doon aan de kómmendje declamatiewedstried. Aanmelje kan op de meiste sjoale, mer get hulp van thoes is noats weg. De beuk mit gedichte kómme ouch in de laeswinkel te ligke. Informatie: tel. 0475-482146.

De finales zeen op zóndig 29 mieërt in Zöstere en op vriedig 3 april in Pej.

5. Aangeklèdje jaarvergadering.

De jaarvergadering is dit jaor op woonsdig 4 mieërt. Haopelik kómtj g'r weer mit zoa vööle es anges. Want behalve vergadere, is 't óntmoete. W'r drejje - es dao tied vöör is - ouch de **filmkes**, die oppe aovendj äöver de Echter Krakeling en Vuurstein neet wólle loupe. Noe haopelik waal!

Wie ruim tevööre aangekondigdj woor de vöörzitter van plan op dees jaarvergadering de taak äöver te drage aan 'ne opvolger. Dae is d'r nog neet. 't Bestuur haoptj det g'r dao äöver wiltj mitdènke, want 't betruftj de toekóms van oos vereniging.

Tót zeens bie oos activiteite,

Ton van Wegberg, vöörzitter